

四庫全書

集部

欽定四庫全書

集部

錢塘集卷二

詳校官庶吉士_臣馬履泰

檢討_臣何思鈞覆勘

總校官檢討_臣何思鈞

校對官編修_臣楊壽楠

謄錄監生_臣邱國柱

欽定四庫全書

集部三

錢塘集

別集類二宋

提要

臣等謹案錢塘集十四卷宋韋驤撰驤字子駿錢塘人皇祐五年進士除知袁州萍鄉縣歷福建轉運判官主官主中出為夔路提刑建中靖國初除知明州丐官祠以左朝議大夫提舉杭州洞霄宮卒其事蹟不見於宋史

而集中所載袁狀祭文諸篇署銜尚存可以
得其大概焉端臨經籍考有錢塘韋先生集
十八卷宋史藝文志卷數亦同是編原本十
六卷前有收藏家題識宋板韋驥集係明吳
寬家藏本原闕第一第二卷實止十四卷檢
勘書中凡構字皆空闕而注其下云太上皇
帝御名當由孝宗時刊本抄傳特所闕兩卷
諸本皆同今已末由考補耳驤少以詞賦知

名王安石最稱其借箸賦而集中未見考宋
史藝文志驤別有賦二十卷當別在賦集之
內而今佚之矣其古體詩亦已不完而梗概
尚具觀其氣格大抵不屑屑于規撫唐人而
密詠恬吟頗有自然之趣雜文多安雅有法
而四六表啓為尤工其精麗流逸已闕南宋
一派雖未能接跡歐梅要亦一時才傑之士
也謹釐改目次即所存之本以第三卷為第

一定為一十四卷著之於錄屢經傳寫脫落頗多世無別本其可知者隨文校正其不可知者則姑從闕疑之義焉乾隆四十六年五月恭校上

總纂官

臣紀昀 陸錫熊 臣孫士毅

總校官

臣陸費墀

欽定四庫全書

錢塘集卷一

宋 韋驥 撰

和鄧舍人讀之果碑二十韻

之果之碑何所刻昔者秦人紀秦德風鏤日鐫斷璞昏
雨暴冰殘老龜坼微芒遺字三四行容易歷年千五百
文詞事實可攷求賴有子長修簡策始皇末年氣益矜
輕視天下夸功名玉墀金戶厭宮殿不遠萬里為游行

鼓鍾帷帳不移徙所至毫髮皆如情溫寒清暑迴造化
絕深度險安經營徐市盧生巧窺測浪語神仙致君惑
東巡亟欲見三山從此海壖來轍迹神仙杳邈不可攀
六龍迴首滄波碧從臣無以慰躊躇請陳勲業刊諸石
高文大句如形容將以榮耀傳無窮銀鈎玉箸勒永久
變故恍忽如飄風人心恚望鬼神怒瀉池神恠俄符同
禍秦非胡胡在國長城未畢咸陽空空遺此石蒼崖裏
萬古悠悠辨終始雖然篆刻半缺訛至今不得藏虛美

世人往往愛瑰奇蠟澤松烟印之紙覽觀莫不哀所為
豈獨玩焉而已矣

送皮獻臣郎中赴河朔

提按使羅
袁州作

明公器業真無敵術學精深貫今昔胸中應變勇所為
韜養許誰窺畛域立朝壯齒名已高君相都俞采風迹
擢從畿邑超等倫寘之計府憑宣力古來才盛多見排
議論波濤起尋尺剖符江表雖左遷憤恤何嘗動顏色
惟思補報誠益勤奚翅循牆驚寵錫鋤姦整敝皆得要

百事詳求不容隙宜陽編戶十萬餘疲瘵彌年逢藥石
旄倪愛戴憂公去口頌心祈繼朝夕除書忽爾天上來
借寇無緣徒悵惜汝曹固恨奪慈父上意其如念河北
河北近罹災變深墊溺之餘病艱食經營調度難其任
正是廟堂精選擇此時委寄非平時賢者豈辭當遠適
長川六月風雲爽冉冉雙旌標畫鷁送行擁岸車馬稠
戀德尤多淚沾臆哀民慎勿挽公舟蚤看公歸廣膏澤

觀劈石

藍輿遠冒西山色宛轉羊腸踏寒碧巖涯深處屢騰聲
何事晴雲多霹靂尋聲迤邐過枯林始見羣工劈山石
斧斤鋒刃奚足云鐵楔縱橫乃為力隨文察理以段致
大或尋常小盈尺心冥手應出自然不啻庖丁操騂耆
問其勤苦將胡為驅車運致希酬直牛山濯濯罹採伐
萌蘖悄如無夜息此山遭值甚牛山攻擊何年可終極
石頑人智其奈何智巧反為天地賊

和殘臘幽谷西遊適

晴光泛泛山之阿
谷禽朝飛聲已和
溪面冰消玉沙活
臨溪逆想春風過
忽來忽往祇隨興
騶從屏真殊無多
略挽梅梢數纖葉
後日重來添幾何

賦金橘得曲字

結根長江左
移植清流曲
朝暉歛夜霜
香苞間寒綠
落落黃金丸
堆盤照明玉
遠想洞庭姿
宜慙風韻俗
嚼
聊一評嗜甘
毋見辱

即席

金爐獸焰迴春律碧瑱螳花資野逸臘枝剪斷玉蓮光
歌扇舞茵爭秀出主人醉實實醉德傾兀不慙冠武側
一時陳迹去莫追此段清歡寧易得

復用前韻謝和鄙篇以送行縣

耐衝曉霧狐裘密亂踏寒霜馬蹄逸徧行屬邑敢憚勞
樂歲償逋民易出雲間想戀雙旌色跋轡長坡首頻側
更懷珍句重見酬一顆驪珠探領得

和待梅花從一字至十字句

梅遲迴雪已消花未開傍山林館近水亭臺相期白玉
藥數費碧雲才況有冰霜對偶且無蜂蝶嫌猜含蓄清
香知自負包藏幽艷俟誰來嶺頭信兮使騎未至樓間
怨兮角聲已哀提壺秉筆兮酣詠其側花神有知兮得
不留心哉

陪宜春守皮獻臣遊化成巖

城闌北出春江濶鐵鎖聯舟波浪截驅車度岸得幽岑半
帶雲陰青欲活何年造化成此巖誰為高閣依巉巖穿巖登

閣意思豁氣象百種相交參雙旌遠映蒼烟色山鳥江花
俱自得使君暇豫真適然萬室鳴絃不知極江南舊美傳庾
公浩輩與逸陪遊從風流不減當時盛獨愧非才列座中

和新晴

晴溪淥于藍舴艋隨風泛春光一何明山川在軒檻杖
履登青臯牽條繫柔纜追攀盡幽興尋源達觴盞

早春遊王氏園看牡丹約花開再遊探韻賦詩得

早字

蜿蜒溪岸尋芳草似覺城東春色早並溪穿竹入幽林
己愛和風養華藻參差彫檻木芍藥細葉新抽看漸好
花開使節儻尚留願奉清樽為花倒

和留春亭席上送蘇判官

淮野征途人鄰邦蓮幕客飛鳥逸鞭聲遙山引行色歸
歟况春近林芳多甲拆投宿可收燈囊中夜光白

以君得翰

林新句故
有是云

飲櫻桃園

拂閭尖出櫻桃表花枝巧向春風裊四座交飛白玉船
一聲相勸提壺鳥搖搖畫隼青天杳落日酣歌近芳草
撥開塵湫從清遊安得樽前辭醉倒

州宅牡丹盛開蒙剪欄中奇品見贈仍屬為短歌

於席上

永陽州宅如仙隱花藥粧春有畦畛牡丹開處綵為欄
翠幕障風怯風繁日高花醒一開筵酒殘照花花自晒
東君不負禁林人猛放滂葩肆鉤引莫教狂雨妬清歡

狂雨來時似秋槿主人愛客令剪送一朶綵雲離玉笋
飲量恨非千丈陂欲吸百潮還噪吻殷勤厚意不可酬
謾作短歌羞不敏

新泉

美泉在山人不知美泉出山還有時琅邪之東幽谷西
公來發此清漣漪搜尋土脉示山叟霜鑊入土荆榛披
逡巡方丈露澄瑩十目爭看青琉璃一之二之來甯沸
巖猿驚嘯溪禽飛呼工蕺手甃白石玉匣寶鑒生光輝

自從開鑿貯寒碧朝雲夜月常遲遲春華將近天氣爽
公携賓從何逶迤回環欄楯照丹碧顛倒旌旆浮歲蕤
飛觴弄翰不勝樂梅柳恨不先芳菲此時玩泉愛清切
異日飲德欽規為甘香潤澤濟枯槁源源難絕滌人思
賦醑醑短歌少留行旆

醑醑高架凌春風飄然疑與天香同瓊英綠葉何玲瓏
開樽爛賞情無窮把酒祝花花且記玉堂仙人將整轡
柔條好為挽雲輶少慰邦人戀軒意

曉雨離銅山驛

北風吹雲頑不散
山雨蕭蕭夜將旦
起來勉強著征衣
索馬躊躇就途宴
岡泥漸滑沮邁邁
林靄正濃迷遠盼
旅懷慘鬱亦所宜
安得秋陽露霄漢

宿景德方丈

塵迹走塵途
禪林少禪客
我來宿方丈
但愛秋月白
夜分始就寢
萬籟同一默
清輝滿紗幌
歸夢徒反側
木魚雖無心
根根動吾息

鷺湖仁壽寺

環抱烟雲峯坦夷杉松逕古寺聊稅鞅忻然遇幽勝躋
攀上崖閣足以遠眺聽秋花或丹紫殘蟬尚呼應著處
有佳趣征途自無定臨風誦韓詩兩事皆害性

石井泉

淺淺山下洞澄澄洞中泉泉聲寂無聞泉色碧於天解
纓不欲濯瑩澈殊可憐掬飲聊漱甘願我心常蠲

上饒祥符寺山亭

時太守劉
我酒率遊

聯舟以為梁度溪即幽寺危亭躡層雲遠日得以肆城中樓閣多水外峯巒翠地主喜載酒相從車馬萃客心正悠悠巖闥促回轡

月巖

一等造化功此巖何異絕其高僅齊雲中空杳如月如月月不圓望之光芒全何人植蒼桂婆娑亦相緣凡物偶有象愛好獨難偏強名雖自人所得重天然詩者銜巧思或比蝕與弦由來假借中奚必加鑽研

九日鳳凰寺

節物驚重九區區尚山行固無登高約遲明即修程下
馬入古寺榜懸鳳凰名來巢古所傳至今得微稱拂席
坐其堂耳目一以清歛然壯穉集徃徃持盤甕問其何
以至云此謝秋成年年當此時村落相經營薄具煩飮
餽所將惟至誠感此良自嘆吾生殆如萍從仕徒袞袞
退歸亦無田去歲嘗為客今晨復遄征佳節眼前過有
酒難獨傾紫萸金菊花何以為芳馨豈如羣野人蹄泮

自紆情行矣姑勉強義命心所明

過婺源諸嶺

古言行路難非獨在險阻茲馬婺源道登嶺足勞苦何
謂路之難其他未足數躋攀上崎嶇僅與猿狖伍下臨
萬丈崖險黑不可睹馬蹄長及腹僕領幾著土俛盼飛
鳥背仰躡游雲縷藤蘿為所依用力必審舉終日踐羊
腸天寒汗如雨凝結本無心開鑿知強取君不見世情
嶮惡未易論此嶺雖高前孰禦

古金章

金椒民間二稚子得金章于野
分而競焉入于縣縣以獻州

黃金鑄印龜為紐埋沒郊原已綿久春泥深處觀耕蹄
臘雪銷時經獵走臘去春來幾百年年年寂寞無寅緣
不知何代何王賜於此奚為獨墜捐由來至寶寧長棄
一旦光輝難自秘牧兒荒子兩窺觀不識彫章祇知利
里胥白官官為收歛從下邑歸之州發囊啟襲生精彩
十目爭視寒星流粲然五字分明在蒼龍副將軍所佩
將軍安在惟空名方寸堅剛終不潰物否而通理所宜

在人誰謂殊於斯請看金印雜瓦礫未逢採拾毋輕嗤

中和堂

秋陽遠泛秋山色越嶠連雲聳深碧廓然千里會一堂
勢壓全吳迴無敵古今貴耳不貴目方丈蓬萊徒記籍
安知嚴麗非壺中登覽渾疑脫塵迹芙蓉耐霜紅兩行
杉檜凌空翠千尺捲簾樽俎當清風大白一飛羣慮釋
燈燈輝光生舊牖公以中和樂邦職又欽德操必有鄰
朝夕堂陰看七石

寒菊

仲冬十三日

皎皎園中霜鮮鮮砌間菊長至破旬來茲芳乃幽獨豈
其時使然寒威未加肅又豈各有命榮謝分遲速如何
纖柔質堅可敵松竹綠葉共歲蕤金英相陸續究之得
所自養助為之福去蠹誘童稚剪蒿專野僕恐弱即枝
扶憂乾必澆沃北風賴密樊朝暉借餘燠侵年絕蜂蝶
蹴蹂無雞鷩驚得以保天材隆冬尚芬馥一溉必後枯
生論尤篤孟軻亦嘗歎濯濯牛山木奚獨物有是在人

宜慎毓關節防疾疢驅除先嗜慾所養重於心非徒口
與腹所履正乎道非徒險與曲紛華靡交戰忤害盡消
逐自然致冲和久壽不遭促持茲養生理可繼喬松躅
興作寒菊詩葩浮寧傳俗

題君佐寓翁庵

人生擾擾無非寓以寓名庵深得趣寓翁之庵年月多
一日持文索詩句乃知主意不在詩欲以斯言昭未悟
吾儕又作寓翁庵附贅懸疣聊復賦

觀江都王畫拳毛騮

憶昔曾觀名畫記畫馬獨貴江都王當時所畫拳毛騮
聲名氣格凌有唐太宗愛之自題識縑素翕輭生輝光
何年流落傳人間至今不泯猶珍藏高堂邂逅一注目
騮髴神駿如騰驤拳毛騮非凡馬匹天駟之精為時出
虬鬚英主數跨鞍出入戈鋌勢飄逸穀州洺水血戰酣
電轉風馳萬人屈橈槍掃盡社稷牢歸來始覺金創密
江都能事妙入神落筆奪得造化真星瞳月頰批竹耳

一毫不謬誠絕倫時移物化丹青在後世乃識真騏驎寂寥莫繼數百年其間唯有曹將軍將軍畫馬超儔侶於此區區奚足數為圖謾雜師子花忍使龍姝失其處予知此畫名實兼虛美安能動今古歎嗟不足聊一歌却愧辭華非杜甫

求陳和叔草書千文

伯英臨池池水黑世稱草聖真無敵逸少竒蹤昔所珍曾為換鵝書道德晚有張顛尤恠偉意自公孫劍中得

由來傳播千百年筆法至今為準的近時此學雖凋零
妙絕何嘗虛賞識唯公氣格出天然揮掃能兼古人蹟
縱如烟海魚龍遊俊若秋天鷹隼擊斡旋舒慘在術內
心通手應難窺測曩傳法帖久已寘安得千文飽矜式
越溪明楮白於霜畫永願公飛電墨

謝中書張侍郎分惠賜永

蒸雲熾結炎威稔紫禁傳宣馳內品頌永首及輔臣家
三伏歛成秋氣凜寒光瑩澈帶恩輝圭角崢嶸出天稟

紅塵不敢傍朱門。溽暑何由近華寢。無瑕獨愜水精盤。
薦冷潛被文石枕。池鳳應思引輕喙。鼎梅亦覲清餘飪。
蝸廬窮處厭煩酷。嘉惠分霑幸尤甚。兒童驚目且相懼。
蠅蚋竄身寧自審。荷公借潤變焦枯。食藥肺腸方渴飲。
強持累句冒鈞衡。深愧才華非鮑沈。

暮夜還家得清叟所留二詩因以謝

暑雲結雨殊蒸鬱。騎馬天街塵土沕。汗漬巾冠溜墨珠。
兩目昏眊情忽忽。入門下馬意歛紓。一派清風偶飄拂。

豁然自喜方自疑短軸碧牋僮捧出開卷知為清叟詩
濯熱蠲煩一何疾清叟之詩豪且麗筆力滂葩少儔匹
上篇首吟東府西壁之畫竹勢髴龍孫見奇質繼言手
植湘川斑一一琅玕露蕭瑟次篇追憶錢塘西湖之荷
花十里紅香夢難必形容摸寫極纖妙造物無心為之
屈繫余何幸併獲觀冰飲玉壺清澈骨須臾狂霆轟雷
車至寶似難安陋室欲還却記古人言在處護藏宜有
物且攄鄙思酢所貽無以續貂還見詰

昨日輒以鄙句奉謝重辱長篇為眎再藉來韻和

答

屋梁曉影初日暎銀潢下沃崑岡焚鐵騎騰突方追奔
璵璠入水體自溫翩翩夢翼飛天門異香氣力能返魂
真珠傾寫琉璃盆青銅古鏡磨塵昏知音聽鳳裁龍孫
重然寶劍垂荒墳扶搖九萬觀化鯤君詩體格能並存
大言軟語清蕪渾搜索物象窮乾坤瓊牋碾出花無根
字字馥郁如芳蓀至寶無價難輕論洪波蕩縱長鯨吞

元化運轉通崑崙探頤不見彫鐫痕胡為及我窮陋門
守護固乏育與賁美材誰薦為犧樽纂之疏布飾以琨
致用清廟非常恩

和彥常看月

雙扉窈窕疑仙穴鎖宿彌旬塵事絕夜色蕭然鼓二中
聯步空庭望寒月衆星掩抑天無雲萬瓦鱗鱗帶霜雪
俯看腐草亦光輝仰數冥鴻自行列瑤臺十二好裴徊
銀界三千孰分別鉤簾却坐未欲寢况有高談助清澈

忿忿置酒當虛欄
餽款飮餌殊微纖
長檠徹去不復用
豈假密炬徒炎炎
追思李杜篇章妙
亦有狂語時相兼
舉杯勸飲一何怪
斫桂浪慙尤難厭
豈如我輩賞以意
一觴一詠情何恬
興闌影側各分散
心月兩適俱無嫌

謝鄭州張資政惠書寄酥十四韻

崢嶸歲律垂更舊
蕪室蕭然度清晝
追想牙旌欲首途
策羸取別嘗重復
躊躇去德不勝情
歸迫嚴闔僅能走
歛驚霜月再弦望
西向拳拳使心疚
心之疚兮日益深

使者踵門書忽授璨然誨語盈累幅字字輝華敵瓊瑋
殷勤睠與奚所貽紙尾復題酥以侑開緘珍視未敢嘗
捧重臨風且三嗅初疑黃玉可如泥和以露華凝不溜
又訝仙膏久鍊成自有光芒發昏瞽輕言豈學陸機對
以况尊羹一何謬依稀乳酒下青雲詩慕少陵慙淺陋
汪洋惠意不可酬七箸姑停聊密覆留向春朝助後觴
却望台星祝公壽

之文

十月十四日離益昌
十九日叩提館作

薄晚出城闌江橋渡清澈暝投僧居宿虛閣對圓月收
燈納寒光瑩淨見毫末久之未即卧爽氣愛軒豁既眠
復輾轉竟夕灘聲聒嚶嚶辨初鳴隸報馬已秣就途訊
所歷七驛皆岑絕自茲五昏曉寢食乃其歇肩舁及攬
轡必步由險輟側身經崎嶇仰首睨巒嵒縈棧遠如綫
危處甚髣髴獨摧跨不測震足殊晚艱履之為不疑無
乃微幸切緣崖矚飛濤盡眼噴霜雪往往生眩轉收盼
不敢瞥間或得佳趣終多備驚蹶高峯砥玉枕日射增

皎潔因以名其村野老能指說蘆廬盡流泉夜響每淒
咽哀吟聽猿狖殘星半明滅邊城行漸近山勢如削鐵
跋歷愈艱苦氣象且凋缺蕭條道旁舍編版代瓦設田
婦負所汲鵞肩語嘲哢對此動嘆嗟閭里念遠別我行
緣所職期會尤慎發指日鳩羣衆鄉兵謹冬閱腰弓盈
半萬著令明賞罰顚顚覲訖事且憚糧糗竭唯予敢自
暇憇止養關節所以圖兼程倂勉強羸劣讀書貴行志
王事無瑣屑致身非青雲努力乏奇烈天涯適馳走使

指亦忝竊何當成歲課
歸奏黃金闕解組雖未能
乞麾
斲歛拙優游近吾土
庶便松楸謁遐想無以止
作詩紆
鬱結

小仲渡

山椒積雪尚堆瓊
山下桃花已開錦
若教傳畫入中州
便謂仙家事難審

得鹿

利州蒿
平道

呦呦山中鹿
倉卒出深藪
車徒歛以至
驚顧却衝走
荷

篋適當之觝觸難措手一夫不能勝犄角賴前後我馬
止其所險隘不敢驟思欲縱之去騰突懼反受蹻蹙繫
四足憤氣徒陰吼更番耦八肩雙隻度九堠順風率汗
背暮達行館右解徽置中庭微息已絕脰事殊注虞旗
難以公私剖鬻割遇善屠騷耆聲隨肘均霑及兵隸不
使或薄厚投醪古所重況此徧羣口聞音不食肉茲義
予獨守猗嗟鹿之微其命殆非偶不由馳獵窘不以罟
獲誘遂巡赴死地有若杵投曰無乃失所向猖狂自貽

咎彼類榛莽間知而能警否

百堂寺

巍哉江之干故迹百堂寺寺塾徙於旁遺構十一二百
堂依巖崖像貌宛以備間雖或彫缺亦足起敬畏江流
幾淺深江木幾榮悴舟車日往還興寢誰復議鑪香有
餘燼無乃妄僥覬獨歎鐫鑿功綿歷何所自

石櫃閣

一登石櫃閣載讀石櫃詩詩人不可作詩思清可思至

今江水流哀響猶依依佳趣想如古物是惟人非孤烟
起林坳夕鳥相與歸攬轡復前征長言解歎歎

石鑿

石鑿久已傳往還迷所自下馬詰亭卒指以水之涘徐
行即其旁執鑿俟我至問其將胡為云此久埋秘泥沙
亦易發應手可立致逡巡肆揮舉兩鑿露精粹青如碧
琅玕光瑩非琢治圓模出自然小大羌有貳石根不可
窮名鑿乃以類象物固其偶蕪沒良可喟儻非以名求

何以見珍異顧我乏高才為詩強標識

過龍洞

曉過龍洞口秋雨寒江急難炬撒星飛隨風光熠熠危
閣勢凌空履滑難擇澁特特馬蹄聲谷虛良易入祇恐
驚神恠轟雷起蟠蟄豈不念懷安自公忘岌岌

和蘇進之同遊烏奴山告成寺

長風掠疎林殘葉何悽悽浮雲帶遠山半壓愁眉低縱
遊烏奴寺乃在嘉陵西嘉陵清且湍依約剡中溪十月

未成梁傍舟祛挈提篙工上下手往往咭州犁繫纜卽
肩舁踏石避角圭詰屈上嗟峨恍若登雲梯下視飛鳥
背仰聽驚猿啼叅差列佳境畫幅展不齊崢嶸樓殿雄
勢欲凌烟霓香穗暗金像嵐光映璇題寶函發神翰燿
燦壁與奎聖言遠如天至理豈易稽洗日幸榮觀詎止
徒攀躋四座敬無譁寂默桃李蹊遺韶動衆聽司南警
羣迷茲辰尤樂只併合又將睽鵬搏九萬程鷦鷯一枝
棲其適固均耳安中養天倪

喜雨和曹子方

班超已老入玉關仲子欲絕得螭李洗腸術妙久疾愈
拜井誠危湧泉起較之今日遇滂沱彼情未足方吾喜
自從三月變旱暵百日磬磬沸田里豚蹄榼醕謾禱求
朝夕叢祠致拳跪苗根土乾類龜坼愁望油雲杳無埃
富憂攘歛貧憂跽疾首蹙額誰不爾噫予豈獨釣爾憂
反覆萬端思所以察寃遣滯督郡邑焚巫暴疋固非理
精虔賴我同僚賢甘澤應祈哉可弭沛然傾注數十刻

溝畎皆盈一何偉閩山草木亦增輝萬口懽聲寧遽止
翌朝又復得高篇磊落珠璣光滿紙強酬珍貺愧拙踈
兩喜相投當不鄙

武夷游仙詠

崔嵬倚天蒼翠勻羅列百里清無塵氣象不與凡山鈞
舉目已訝非前聞悠悠官道行溪濱不陟峻險仙源分
穿松度竹微荆榛古觀壯麗依嶙峋道人鶴氅烏紗巾
引我舉棹乘長津橫灘激浪花如銀舟子敏捷妙入神

縈紆逆沂山之根兩壁萬仞干青雲如庵如室如倉囤
竒蹤恠狀何紛紛仰觀持久頭酸辛開蓬偃卧望始真
遺機斷脫壚不熏漆棺不朽藏何身雞窠亂草宛若新
舟航六七排魚鱗半入崖戶誰施陳輒疑構置因昔人
留此詭異矜常倫却看危峭無攀捫下插萬丈深潭淪
雖有智力何由伸此莫謾詰徒自勤手披舊記煩咨詢
逃想會仙奚所存兩峯最大勢最尊當時曾集三千賓
幔亭鋪設紫雲茵酒味醇潔餽羞珍鳳兒荷香藝絕羣

賓雲奏徹更幾春飲散祇以夸曾孫神仙渺茫難重論
此會此語相傳云儼然遺迹尚不泯嚴祠唯奉武夷君
潜有惠澤均斯民我遊自午至夕黜目力所能纔逡巡
長言記錄濡毫頻師仙術異非所欣但悵勝槩無緣隣

行役一首

離建寧縣
宿緣心院

浮梁跨寒溪出郭十餘里暝投僧舍宿月影清如水剪
燭吏文退孤坐俄隱几逡巡念歲月凋疎驚鶻齒少學
雖自勇壯行何不偉胡為浪奔走豈足稱使指許國徒

有心歸田尚無擬徘徊仕路間老大良可恥氣弱不耐
飲詩多常累紙一吟聊破悶再詠漸臻理以及百千言
往往不能已且以養情性固非爭綺靡此樂非絲竹美
聽不在耳紆鬱得以紓易直油然起所以驅馳中冥搜
未嘗弛今宵幸夷曠似匪塵紛邇悠悠萬感集銷爍欲
何以遂為行役篇篇成姑自喜揮毫復吟諷若與嘉賓
比疏泉以養泉所益不在彼蛟蚓間相雜要之適吾已
儻或不吾知奚卹譏狂斐

別李世美

御茶貢了文書閒靜坐一堂生畫寂木蘭花謝葉成陰
霽日輝輝蕩輕碧主人為我開芳筵灩灩金樽泛春色
舉杯相屬念我行贈以長篇重圭璧聯官共職誠意鈞
踰歲光陰駒過隙自慙老鈍於事疎每幸高才見裨益
招攜地寶溢課輸立遣訟筒平鬱抑隔州移粟賑疲氓
指日毆兵斬狂賊走章馳檄公事外閒有賔酬副清適
搜羅絕景窮造化鋪寫幽情露胸臆今朝飲別接殷勤

判袂分歧在朝夕萍蓬邂逅難期度魚鴈附託宜頻的
願聆三節促歸軒聊慰馳情想風格

和禮部蘇尚書釋枯

淵明植五柳萬古清風傳子猷種脩竹幽況亦飄然
崢嶸韓退之甘受庭楸牽由來高爽姿氣欲凌雲烟嗜好
脫凡近孰能窺後先嶽嶽尚書公聲華天下賢儀曹經
畫閒春日方暄妍不思葩蘊妖惟喜操節堅呼工斬惡
木買松種堂前培溉勞朝夕霜雪期千年北垣有餘地

虛鍾徒自憐名卿送珍材類至誠所緣穉枯僅踰尺標
致懷叅天拱把念所養扶持必周旋孤根舊土隨不使
知其遷逡巡十旬浹生意何鮮鮮棟梁他日功願遇此
辰偏清詩為題品光芒耀星躔枯榮詩不朽流芳共綿
延後來戒剪伐當繼甘棠篇

和孔彥常侍郎癸酉冬雪

淳深等彭澤瑰恠輕玉川讀公冬雪吟爽氣何飄然齋
祠宿華省對此同雲天坐看積瓊瑤光輝想藍田泥滓

歛藏垢朽枯頽增妍紛紛布寒空往往迷飛仙狐裘綢
餘溫薰爐凝平微烟清冷徹心骨復誰嘲畫眠雄詞筆
下驅若放春水船慶豐仍記歲諷咏期他年

留題忠州豐都景德觀

豐都縣北岷江側古觀崢嶸耀金碧層巒秀拔異羣山
喬木侵雲競千尺二仙去久丹灶冷王方平陰長生丹竈尚存空載

遺文在碑刻俗士紛紛徒嘆嗟曾有何人繼真跡

岑公洞

耿耿石洞天開鐫岑公之隱來何年一朝仙去名晦然
商人受香忘所傳舟抑不進方省誓奉香入洞舟乃前
靈蹤自此人拳拳至今乾溢皆致虔恍忽應禱殊無偏
我來敬謁歲欲遷艤泊沙磧登舁肩蹴踏錦石行江壩
洞門屣步侵雲烟瞻望塑像欽華顛挺之作記誇唐賢
勒珉雖昏辭尚全卻恨戾止非炎天不見百尺懸飛泉
唯有巖竇聲涓涓頃之自可遺塵緣况乃投隙圖留連
嗟予遠宦方拘攣搜奇尋勝姑勉旃此日得此澄心淵

安能擺脫追神僊臨崖浪筆書長篇

追詠西園海棠

西園正月月欲殘海棠一株花正繁滂葩艷艷鬪朝日
露洗蜀錦紅光寒回環桃李競無色卓爾獨秀當朱欄
兩春行役不及見今日偶幸官身閒擬開金樽恣懽賞
酬酢宿恨開衰顏無何職事忽牽制遽戒舟楫乘波瀾
却嗟逐物猶蒂芥未免回首興長嘆悠悠清夜入寤寐
往往蝶夢曾飛還歸來綠葉空滿枝正與老態相追攀

須知樂事少如欲誰謂天意於人慳

楊內翰讀書堂

無為山色參天碧翰林舊隱多遺跡跨鶴凌風去幾年
獨有文章光翕絕構堂續志廣所存善矣鵠原足餘力
清白永隨風月久形容杳與塵埃隔伊爾歎憶四紀前
曾躡雲梯附鵬翼此堂坐想不獲登謾寄長言勒巖石

八月十八日觀潮

浙湍浩漾連溟渤宵晝潮頭卷沙出中秋三日日欲西

一歲之潮盛今日雪山橫亘截江來巨浪翻空生倏忽
吳兒當此誇善泅執炬揚旗徐出沒旁觀奚止動精爽
壯士為之猶股慄由來習俗競茲辰士女欣然勇相率
紛紛畢集遶長堤翠蓋成陰何櫛密邦侯樂衆為開筵
歌管凌虛過雲物玉堂鉅公臨右席賓主交輝映簪紱
注目應同濟川念賞心仍寓和民術區區下客久不逢
二紀光陰容易失幸陪高會還舊觀聊解嘆嗟揮老筆

讒龍

退之昔日讒風伯今日吾友讒應龍應龍聞之兩耳卓
急卷海水飛長空陰雲曠曠為後先變化赫日成昏朦
田間槁穗有生意號子屬續盧醫逢望霓萬口動一喜
徃徃備賽求玃玃頃之氣象復舒霽飄灑尚不遭溟濛
龍乎奚爾不努力遽若有稟還收蹤天豈虐斯民不欲
為年豐林林未必皆咎戾必有任責當其凶斲君勿讒龍
讒龍非無從旱乾水溢各有召應答不謬如洪鐘昭昭
之鑒明且威詎敢曠久而忘功一欲竊弄權霧霈私羣農

震怒起旋踵
菹醢誰躬慎
無凝土像天
矯晝夜狂舞
青衣童精誠
脩警感畢聽
朝暮膏澤盈
寰中

和董都官登城南樓

危樓百尺據城堧
徙倚渾疑到紫烟
卑濕豈愁梅雨地
清和尤喜麥秋天
一川晚照飛孤鷺
滿袖薰風聽杜鵑
鄉思搖搖白雲外
官拘唯幸際堯年

思養

懶登危閣望天東
山外風烟隔幾重
白髮庭闈未歸侍

青綸塵土若為惊故鄉遼曼踰千里薄宦拘攣等萬鍾
指數瓜期尚稽遠悠悠斗粟為誰春

上太守陳少卿十韻

風流富川盛善政久濡霑市價童無惑關譏盜不潛賣
刀人向本讓路俗知謙明府精區處園扉絕滯淹青綸
方調補內屏幸趨瞻直道爰來遇孤蹤豈自嫌有時申
讞議仰見霽威嚴志得寧辭賤公閒倍養恬奚須祈汲
引足以慰清廉靜念官居樂長言孰可箱

董都官索署中山亭詩

突兀靈亭倚翠微
紛然塵境此中遺
高明頗愜星郎意
邃密如嫌俗客知
吟對青山搖玉麈
醉臨華月解銀龜
襟懷蹇蹇安閒久
偃卧多應夢赤墀

荅董都官索去年詩債

軫下傳音旨胸中
長忸怩如何終日
暇猶負隔年詩寡
和知聲妙難抽恨
思遲殷勤還見趣
荒鄙敢為辭

和聞新制間歲貢士

五載興賢日月疎間闕多是老閒居朝廷遠慮淹才弊
郡國新頒間歲書士子將期賀空谷詩人當復興嘉魚
無能自愧逢辰早已脫犂鋤就棧車

和江亭春半

亭壓長江氣象雄清明時節夕陽中天邊遠嶂橫深翠
花外餘霞沒亂紅鷗鷺飛鳴得閒趣漁樵歌唱有淳風
誰能共向春光醉窮達多忘學塞翁

和久雨

陰霖繼月酷相因旱魃今年遽喪神膏澤翻憂害東作
芳期那敢愛青春非無官政還蒿目奈有民咨易動唇
天聽甚卑羣語切雨師何事未迴輪

和寒食在富川

城關咫尺到春郊躍馬行春固不勞寒食蕭疎觀物態
楚歌嘲哢聚兒曹平湖漾日扁舟滿芳榭迎風畫鼓高
薄暮田翁醉歸樂山花倒插挈餘醪

雜詠五首

一提壺

長林棲息自安如謾勸閒人挈酒壺
世治有誰從醉隱
徒勞健吻汝知無

二竹雞

切切聲呼泥滑滑強闌人事最無機
安知巧舌為身累
鎖向彫籠不得飛

三聞蛙

蠅氏官亡種類滋脰鳴連黨欲何為
喧然無理令人惡

憶著昌黎吏部詩

四 忘憂草

憂樂由來繫所存
強名微草不須論
簞瓢悅道顏淵德
陋巷當時豈種萱

五 杜鵑

啼血辛勤爾自貽
百花時節好閒飛
行人日日春山過
相勸相呼總不歸

惜花

玉人攜酒對花枝
悵息紅芳已半稀
楚悵歌中別虞氏
馬嵬丘裏顧楊妃

清明聞楚歌

髣髴漁陽鼓
摻摻依稀秣江左
後庭花
清明舊俗無佳尚
唯此喧聲雜暮蛙

初晴復雨感事

朝暉還復變濛濛
過盡韶華冷落中
媚紫妖紅如病悴
也應無暇笑春風

欽定四庫全書

錢塘集
卷一

三十一

對雨懷陶掾

雨氣侵池館清如秋向深遙知脩敵具瀟灑不關心

錢塘集卷一

欽定四庫全書

錢塘集卷二

宋 韋驥 撰

和聶充甫水南見寄

衮衮孤城裏惟君離俗居
車魚絕嗟嘆詩酒養冲虛
掩面羞龍斷澄心對古書
天其假幽寂停瀟合何如

又和

詩來盛說溪山好局事蕭蕭似隱流
閒對文枰銷白日

勇持吟筆戰清秋城中事逐漁樵得門外客無車馬留
而我拘攣但增羨強酬佳句思難抽

和酬聶充甫新寄

霜葉乘風舞秋雲蓋野平南溪塵境絕東道玉壺清佳
處憐君得新篇慰我情無緣一攜手相共濯冠纓

送李尉解任歸廬陵

官冷餘才晦塗清得代還維舟紛擾外行酒別離間水
落蛟黿伏沙空鴈鷺閒歸歟風味好天末辨家山

攝戶糾二曹事因自戲

三參軍事歸權握賤務區區日倍增却笑近賢銜署貴
時人虛號一條冰

賈尉見迫給廩因以詩戲

月粟見須何太迫賤生奔走正無聊
勸君勿慮晨炊絕
吾黨而今解折腰

送浦大會甫赴榆次

平生落落多豪氣萬里區區赴冷官
今日送君非故閑

一樽為我盡情歡解舟吳浦江雲重策馬并門塞雪寒
富貴功名行孰禦古來新沐必彈冠

賈慶甫示山中梅詩因繼成

雪意將成臘欲來亂山深處見寒梅化工若與人情比
此樹多應未及開

荅魯虞部見寄

鄙才效職便窮僻忽忽天星殆二周繫獄空虛民訟少
倖門堙塞吏心憂琴書永日清無際草樹逢春綠正柔

驚坐高賓如見顧幽懽何惜貰貂裘

又荅惠詩并新鱠

珠璣盈紙將新味方丈分甘及賤夫大啜一杯鄉思動
却嗤張翰只思鱸

獨登臨清閣

陽陽何處一逍遙朱閣臨清興味高翠靄相連結春態
澄光下視鑑秋毫綠楊靜舞腰初困白鳥閒栖目不逃
獨到獨歸俱有意暫期塵土落祇裯

得董都官書因為寄四首

晚來音驛拜勤渠
咫尺拘攣萬里疎
却羨潯陽堤上柳
長條徃徃拂賢車

七年恬寞坐江瀕
今日登途氣象春
請劇書成爲澤大
馬蹄無惜入紅塵

花表危樓遠目窮
華軒不見見春濃
春山繚繞無重數
還在春山第幾重

登臨何以慰相思
把酒開編讀舊詩
正是去年酬唱景

春風花草半離披

櫻花

葉落不隨羣花開亦趁春初包蓮葉白半折粟文皺蜂
蝶遙相笑兒童冷不親華丹君勿責勁直在吾身

和太守臨清閣一首

朱閣新前構崢嶸枕水端地饒千頃秀天付四時寒波
蹙龍鱗活山斜鳳翼攢晴光照毛髮翠靄奪華丹賀老
空遊鑑嚴公浪記灘軒窗通浩蕩棖桷變彫殘靜極塵

機喪清多餌釣難來當思潔白意不在遊盤氣爽如開
凌隄環若刈蘭繪工憂措手詩將勇濡翰遠目窮層漢
澄心俯曲欄鳶魚皆自得宇宙始知寬神物應相護賢
侯與衆懽政聲喧盛美隅泣解辛酸登覽臨春畫雍容
兀醉冠千齡幸臣宋五袴正歌潘環佩銷芳席旌麾揭
畫竿笳簫音嘒嘒貌虎勢桓桓俗樂芹爭采賓歸缺不
彈落成今日事遺愛咏斯干

榴花

本根樹立宜堅厚
華華佳花號石榴
丹赤終能盡敷吐
馨香何必事飄浮
晴光照處火欲烈
雨氣凝時血不流
莫怨春風施力晚
天教美實冠清秋

乾元節口號

祥電當年統斗明
巖廊今日享隆平
三朝功業山河固
萬國謳歌宇宙清
湛露均恩錫華宴
薰風入奏阜羣生
庶官願祝無疆壽
葵藿心齊向日傾

觀棊

不卜天時不背山枯槁遇敵戰談間藏機閤伏三千楯
侵道雄關百二關羣語雖咻難改聽一先偶失若無顏
人心勇善能如此誰謂淵騫未易攀

剪金花一首和陶掾韻

花神委曲競光陰特向低叢剪寸金買斷園林初夏景
意教蜂蝶慰寒心玲瓏圓影風前舞寂寞紅芳雨後深
稚子知名不知實采之擲地聽餘音

枇杷

美種盛東南園林十二三金丸方磊落瓊液正包含採
熟鳴禽怨餐多稚子貪豈須江國重天下嗜桑甘

和陶掾同登曉亭

芳蹊詰曲上亭南小樹縈紆若舞驂直對蒼山班席坐
旋尋幽卉滿頭簪楮皮裁幅明如玉竹葉浮杯淥似藍
共酌共詩其樂勝俗憂應是不能堪

慶甫借棊子

碾玉為棊黑白明臨枰思策且須精莫教敗衄空如掃

却出枝辭輒罪兵

和賈尉女真花

祗恐繁雲熾碧空
火龍晝躍汗隨風
飄來翠葉亭亭處
滴出芳葩點點紅
最美虛心如有待
直饒潤色更無濃
主人為爾邀賓醉
狼藉杯盤晚照中

昨暮會飲慶甫署
觀女真花因求一二諾以厭明
至期不至遂戲成一首

見許黎明和露剪日高何事尚稽期也知更欲延賓履

次第開時固未遲

謝太守惠家園瓜

種繼青門氣類嘉恩傳鈴閣動光華含滋雖本生成力
采實難勝寵賜加冽若層冰破蒸鬱明如碧玉照玼瑕
賤官咀嚼深銜戀代至明年正及瓜

蕭灑參軍宇六首

蕭灑參軍宇臨庭客不過秋花生意漸夏木晝陰多坦
腹羣書視指藜一徑莎塵泥奔走外得此興如何

蕭灑參軍宇年來訟獄稀凝塵掩丹筆蒼蘚半園扉晚
樹鳴蟬沸虛簷闔雀飛何須溪谷隱即此是忘機

蕭灑參軍宇郊原咫尺分門前漲溪水屋角露山雲白
鳥斜陽見鳴榔半夜聞安知名利境馳騁共紛紛

蕭灑參軍宇回環百畝間山光侵戶牖柳色鎖門關盡
愛清風滿相仍白日閒祇羸詩思勇濡筆濺青綸

蕭灑參軍宇疏池小圃東風荷朝披靡月竹夜玲瓏樽
酒有時滿囊錢計日空養恬真得地猝始樂融融

蕭灑參軍宇幽軒占一隅
枰欄雙翡翠薜荔綠氍毹
偃息三年計炎歊六月無
跼藏晦踈拙違俗任盧胡

八月泛江送客

送客欲逡巡方舟艤棹頻
夕陽千嶂外秋色一江勻
酒面紅煙慘歌眉翠黛顰
昔年離別恨今日併如新

送浦倅之闕

翹翹別乘出吳關吏俗隨
轅不敢攀此日謾淹飛蓋
住明時那許壯才閒
秋花幾處逢孤驛涼月相
迎過暮山

金
卷二
請劇書成雙闕近佇聞忠論解天顏

酷暑初夜

盡日炎炎酷暑蒸黃昏氣象未全清
天風難值樹渾靜海月不見雲空明
羣蚋得時方伺隙噪蟬何事懶收聲
噫予自有安恬趣豈廢林間坦腹行

十月

風脚無時定霜花晝亦飛
天愁雲四合樹冷鳥相依
陋室羣書滿衡門俗客稀
饑腸何以療園芋正豐肥

望

木落望始遠陰沈其奈何遙山雲四閉飛雪兩相和天
慘景愈短樓高寒更多凝然空引睇鴻鵠不知過

和吳常甫移石

千夫挽車載無計奈人靈驚起蛟蟠迹空遺鳥篆腥莫
歌山有栲始信物如萍只愛堅姿峭予眸為爾青

再和

突兀見升平前非望汝靈塵途雖闔眼血及不磨腥氣

格希神嶽漂浮賤水萍遇遷何足計唯守自然青

殘春

家近西湖日往還恬然不覺到春闌水邊花發華丹盡
水面清光終未殘

休王其如各有時開榮方徧又春歸東君憂在陽功乏
多少閒雲天上飛

塞上

塞草游駒擯邊城夜不關鍵兒心亦禮老將沒於閒豈

見兵符走唯聞象貢還從茲徐勣比不得塚前山

初上汴舟思歸

夜氣淒清星斗全倚檣引望東南天懷歸重念秋垂盡
倦目羞看月又圓況是汴流投淺涸夫何單舸尚留連
京華豈謂無心戀自恨孤蹤遠遽延

小飲樓上作

西風吹酒面樓閣近重陽悔把菊枝揷幙思鄉路長比
來求熟醉到了減清狂不是紛華少紛華我所忘

舟晚行

汴水日就淺
篙師心不皇
扁舟若無滯
舊里亦非長
殘葉餘秋色
明霞接暮光
黃昏未停泊
獨自倚危檣

汴上榆柳

栽培芟治責官曹
官牒書為第一勞
擢幹不知多少樹
施功唯繫萬千艘
斧斤畏法誰能近
雨露流恩氣轉豪
今歲河堤新決壞
森然安用拂雲高

歸興

船頭破浪疾如雲船上篙工勇力分行色縱無笳鼓競
歸心急在旨甘勤遠山偶向斜陽見幽鴈偏從半夜聞
安得巨觥為大飲亂澆鄉思作醺醺

初入淮上

汴水方窮到淮水大船蹇蹇拒風行不知靜裏千帆過
唯喜空中一派清秋氣已殘山態老夕陽未盡浪花明
牧兒隨隊閒無事強作歌聲和櫓聲

自守

薄仕功名未計高
懶隨時輩強說說
推誠本在求諸內
害義何如寡所交
豈為初官尋要路
唯憂舊學長心茅
清貧我樂人毋謂
不獨揚雄解解嘲

驤每惡晏起強酒二癖因作詩自警

晏起已嗟為惰甚
詎堪酒病復相嬰
未憂居養能移氣
當念懷安實敗名
便腹亦嘗嘲睡癖
腐腸非是醉時清
辰乎徑去誰能止
壯志毋宜恃晚成

感夢

真人無夢夢非真自愧通宵所夢頻凶吉有來皆繫命
豈須占訊復勞神

將赴富川

去年乾沒道途間今歲官期日月慳學古雖然非為祿
食貧寧不厭居閒利心汲汲人皆是巧宦悠悠我不關
三尺若能多所活塵泥何必賤青綸

駐軒亭

下馬得危亭江晴氣象清潮頭千頃白柳色萬株明風

物應如古登臨獨有情行春始今日今日不虛行

過桐廬郡

舟倚桐廬岸春風草樹明經由今假道瀟灑舊聞名山
勢侵雲上溪流見底清茲行得佳味夜枕聽灘聲

過七里瀧

溪流一道突羣峯耆舊傳為七里瀧唯喜幽佳忘世俗
不憂湍險賴篙工鳥聲喧滑春風裏人影稀疏翠色中
却惜扁舟不停泊全輸好趣屬山翁

和紅蕉

欲賦紅蕉擬象難等夷未必下芝蘭霞飛翠嶺分餘彩
鳳宿青梧半露冠舉目盡知驚特秀推誠誰解凡含丹
莫教俗筆空傳畫也作尋常潤色看

和公餘言懷

荆扉棲息久壯志未能攄昨綰半通綬新持三尺書雖
然煩聽訊何足抗冲虛伺隙餘公局開編入燕居敢希
成大器唯恐近污渠心欲平冤獄情奚病滑胥賢門不

多地賤子幸投裾每得高文貺翻嗟舊業疎自滋忘棄
學豈復悵離蔬若使華無實寧為蔽芾樗

和訪古

古人抱道重行志未肯輕從碌碌居孟子歷為侯國客
退之三上相君書心忘險阨高蘇武言極興衰仰仲舒
試問渭濱如不過直鉤何日得生魚

五月到官七月八日始併得家問二

瑣瑣塵泥迹悠悠遠宦心一朝何喜甚連客得家音義

訓通千里人情賤萬金斜陽復東望依舊暮雲深

紅文苑

色若樓文雉圓如挿綉幢春葩應有並秋卉合無雙

和董公肅十日菊二首

自是重陽過重陽菊不遲幽芳始經宿羣好奈隨時未
減黃金藥何妨白玉卮賞花非賞節衰謝直為期

昨日墮烏紗遊懽等孟嘉今晨舉青眼獨自競黃花香
冷朝猶盛人疎勢可嗟明年又重九何以面芳葩

金史紀事本末卷二
扣苦吟二首

夫子吟何切辭源瀉不枯秋山鑿寒玉夜蚌挾明珠感
嘆通前古風情滿五湖只憂長寡和白雪本高孤
驤也饒詩癖才疎思每艱持毫欲臨紙逐獸不知山著
意窮三百唯時見一班羨他唐老杜氣格獨優閒

廳前叢竹

軟枝輕翠近簷垂朝暮清風不失期明月滿庭無隱伏
夜深惟有此君知

八月十四日夜月

中秋垂一宿延頸望金波素魄雖微缺清光已覺多圓
來殊俯近觀者尚蹉跎明夕當如鑒光華更幾何

十五夜

八月得中節今宵秋又中由來金氣王向盡月華充翫
與多方共清非別夜同明皇如未死依舊感蟾宮

十六夜

明月上天稽中秋已過期十分初減處萬目共憐時不

見昨宵盛安知今夜衰清光比他夕猶勝滿如規

詠螢

詩作東山事已賒宵行今復動誰嗟秋高黨類縱橫出
月黑光芒斗頃加風觸羣飛迸星火水澄亂影漾金沙
區區曾有分輝客晉室寒儒本姓車

詠水

澤物施工詎可名涓涓以及大川成更逢卑處須流惠
有不平時即發聲傾側祇將盈上準毫釐寧向外邊明

宣尼所取尤深遠蓋取原充晝夜行

詠竹

此君堅直本天然豈學妖花艷主軒筠帶輕霜凝不落
幹瑤圓玉碧無痕非春長自繁枝葉有地終須大本根
誰為裁音薦清廟定勝嘉木就犧樽

殘燈

寒窻夜將艾一點映蕭蕭焰向雞聲短花隨蝶夢凋何
須惜餘照且喜近清朝老婢不知此荆釵屢屢挑

謝董都官見寄

區區賤質恥無聞深荷明公曲愛存談席方忻接餘論
詩筒多謝遺佳言辭源浩若江河瀉文意過于布帛溫
聽獄平反願承教異時安敢議高門

再貺詩復以前韻荅之

媿將鄙句報多聞操紙安能蔽所存硯墨未乾憂見罪
牋封還枉却酬言長吟不覺手之舞熟覽方知即也溫
長者如興起予嘆撮齊時願一登門

詠草

萋萋廣原上萋萋曲江湄人跡不到處春風似有期勾
牽碧成陣蒙蔽密如絲待看野火烈百蟲悲不悲

聞新鴈

夜堂危坐氣淒清秋月光中新鴈鳴出塞不知多少路
穿雲纔聽兩三聲歸時行列應如舊來處風烟合認程
今夕沙汀好棲息弋人詭計未能成

仙掌峯

巨靈前事杳難評融結皆由造化成山厯古今常似掌
地當西北是扶傾擘開太華幾千仞指出飛鵬數萬程
歲早定須先展效力推雲雨救蒼生

剪刀

一身分二首一首一銛銼遇物無微細交鋒即斷傷剪
齊緊汝銳任用在君詳大抵便柔脆毋令過所長

秋懷

西風瀟灑作輕寒黃葉樓中強解顏畫角幾聲催晚照

亂雲何處是家山
宦途有立寧辭賤
局事無多豈厭閒
濁酒一杯休萬慮
長林烟暝暮鷗還

汴河

通濟名渠古到今
當時疏導用功深
源高直接黃河瀉
流去遙歸碧海潯
護塚尚存芳草亂
隋舟安在綠楊陰
年年漕運無窮已
誰謂東南力不任

黃河

四載收功故道循
滔滔千古勢無垠
流知江海涵容大

靜覺乾坤覆燾均未必崑崙獨傾注祇應河漢共瀆淪
如何騎得鯨魚背直到天涯一問津

和聶充甫晨霜

勿異繁霜早園林已具腓隕時兼夜氣凝處張寒威月
落初分白陽升還盡晞稜稜不終日由此識天機

東庵院

聞說東庵在廬岳浮屠百數獨無雙堂陰翠色連危嶂
門外清光挹大江怪石巒岈坐龍虎老松突兀樹旌幢

何時得對幽佳趣擺脫塵襟酒滿缸

和聶充甫冬曉初起

霜月孤光在寒雞一唱催晨興衣未煖夜誦帙猶開鄉
夢還千里愁腸過九回浚明何所立緹室又飛灰

習曹何君屢有引年之語而未暇請今茲官滿解
去驟作詩言其榮以壯其志惟僚友不異幸同
辭以助之

營營貴富此胡為可止能歸即可師家住嶺南謀退老

官休江左正其時相從祿仕隨諸子得謝鄉閭似者誰
羸取林泉長日月為君潛計樂無涯

司馬南樓納涼

溪外層樓入翠微登臨炎酷杳如遺千山相掩雲爭出
萬浪欲光風倒吹擺脫塵紛得危坐牢籠清曠就新詩
短衣野老遙相目應怪官閒亦有時

賈中甫送慶甫弟來尉永興久之告歸僕多其來
而重其去乃為詩以送之

仲弟安居後先廬憶故鄉睽離何足惜氣義已為光遠
趾他年見歸心千里長西風吹別酒為賦鵲鵲章

賈慶甫以局事乘小船犯風波感其危而為詩且
以相示僕亦於舟字韻和呈其卒章蓋言有俟
以慰賢勞之嘆也

萬頃風波一葦浮髮巢猶穩羨蒙鳩唯余忘膽驚其說
況子輕身坐此舟軻戒立牆雖孝節尊曾驅阪本忠謀
小官辛苦宜無念自古高賢達以憂

公閒念詩社之廢寄陶賈二同僚一首

地僻少將迎溪山一概清秋深孟嘉宅歲古闔閭城吏
隱全輸我詩豪半屬卿社壇何冷落濡筆請尋盟

雨後

西風吹雨過江城林館秋濃氣轉清埽葉堆枯階半沒
步畦經潤履無聲拒霜欲蘂扶疎翠暮雀爭棲格磔鳴
賤局安閒出天幸未湏多口論功名

見省符知有代官一首

寸祿固拘攣區區頓豁然比來符檄至代者姓名傳公
事多閒日歸期不及年喜情通夢寐累夕拜親前

和陶掾見寄

寂默公閒外新詩忽見撞比來知燕坐時得近秋窗臨
奕誇能勝持杯學詐降

此二句陶君之言且中其病也

相逢怯此病繼

晷請然釭

待拒霜開一首

予憐拒霜好獨立冠凋窮故臘新移至經年曲愛隆栽

培曾倩圃灌溉每呼僮覆護障炎日枝撐禦暴風欲高
殲隘葉待盛拓芳叢不取蒿萊蔽那妨雨露濛翠行疎
密等微徑往來通恐折頻毆雀憂衰屢滅蟲清秋方淡
薄碧藥已玲瓏占表如爭勝藏身若養蒙綠幢擎確屨
圓玉琢青蔥美操寒中辨丹心日已充不甘為菊後漸
見出籬東雖本生成力寧非養治功從容延晚節次第
待輕紅肯學楊花雪悠悠負主翁

陶掾書齋小飲

學非焉用贅多多養浩當須繼孟軻把酒相懽外紛擾
吟詩大句破妖魔坐中誰作向隅泣天下今無扣角歌
圭紱巍巍君勿羨安知此樂不如他

秋日即事呈同僚

瀟灑臨霜夕清居守決曹嚴城吹角罷隔墻聽猿號警
卒持更切呼囚報鑰牢訟庭澄一水塵事戢千毛簷間
蚊雷絕池虛蛙吹逃逍遙靜襟慮抖擻敞祇裯樹木凋
零盡星辰氣焰豪月微棕影薄風急鴈聲高憶昔隨羣

學當時晚二髦讀書圖皦皦感古動忉忉意趣青雲近
輝光白玉韜百錢寧問卜一釣箕連鰲直諒謀相與回
邪欲盡鑿自期非幹蠱幸遇豈屯膏翻覬彫文陋難逢
異數褒歲蕤從末宦洊忍著青袍歛翅鷹棲臂垂頭驥
伏槽安能枉尋尺猶得飽藜蒿但恃心如砥那矜目察
毫窮通任甄冶險惡遠波濤養浩雖潛孟折腰誠愧陶
常嗤強蛇足敢嘆抑牛刀衮衮途泥裏悠悠日月慆居
然成俗態何足謂賢勞貧賤非無賴清平況夙遭邊隅

虛障候弓矢載韃橐途易家音數官閒坐食叨人皆譏
野僻我獨固持叅寂寞幾塵甑包并或鋪糟趨時聊勉
勉樂道每囁囁肺腑茲尤慰朋從義不諂相逢甚優渥
得興且遊遨勝賞當隨地秋郊况附壕山溪正堪屐溪
曲尚容舠莫計空清俸湏令貫濁醪菊香分嚼蘂蟹美
共持螯談席爭揮麈詩壇讓擁旄縱橫新義論嗣續舊
風騷氣銳千戈立詞抽萬繭縑功名休掛齒志業本夔
臯

宣赦回馬上口占

黃紙恩書下紫宸
豈惟羣罪許從新
其間多少寬民意
四海承宣有幾人

十月暮登延壽閣

湖水漸如帶扁舟渡亦艱
山空翠屏淺荻老雪花殘
立馬寒烟際登樓靄暮間
嚴闌促回轡吏隱樂終慳

曉坐

曉鼓辭辭日欲升
寒廳危坐對前楹
霜威著樹瓊瑤色

鴈陣橫空風雨聲
自喜優游服王事
那嗟寂寞滯山城
悽悽院吏公衙退
却就書帷萬慮清

夜射通叔虞曹圃

束葦然膏百炬紅
夜堂寒氣變春融
流星半沒飛金鏃
缺月初圓引角弓
賞罰明如棘門上
和容遠過澤宮中
平心不為長眉醉
慷慨真成壯士風

辨詐

遠俗無知祇慕恩
鑿山踰嶺獻麒麟
諸儒不用區區辨

多少難明偽似真

田叔

冒死隨教衣赭衣當時蹤跡已幾希忠哉相魯扶君過
不使民情向我歸

感事

治體清明已久成世途歌側未全平
憐人仗勢千鈞重
直士無媒一縷輕
忍視鑿墉高外觀
更嗟畫餅竊虛名
山林豈是多扁鵲
自為區區志欲行

和魯成之兄弟見謝

新文來復數舊觀
頽然還願助羣鋒
銳那慙底石頑辭
豪雖欲抑理屬不
容刪廢懶翻多媿
衰遲近學山

迎親來畢幼妹之嫁久雨稽阻思望而作一首

江南二月尚春寒
千里安輿冒險艱
遠想長岐同積雨
不知今日過何山
出迎應喜諸孫慧
奉壽須驚兩鵝班
從此莫輕離膝下
茹蔬堅乞侍高閒

董公肅都官被命倅南海以當分符之寄南歸道

中貺書因以詩為寄一首

瘠中邂逅飲寒冰未及公書慰鄙情
脂轄近離雙鳳闕拜恩新倅五羊城
旌旗曉過山川秀笳鼓春歸里落榮
詩社荒涼懷舊將不知何日可尋盟

荅魯成之兄弟以詩惠牡丹

品冠名園蓋物尤主人分惠若為酬
摘無殘雨妖嬈甚將以新詩意義優
幾樹天香盈翠籠一欄春色想鴻溝
滿頭恣揀成狂醉為恐花神恨暗投

聞詔寄魯成之兄弟

天子需賢慮逸遺詔書間歲出丹墀嗟予衮衮成無狀
羨子飄飄正得時能將必先期敵勝善占當自照心疑
相將岐路青雲近莫厭蕭條更下帷

代官未至泊舟頌條門獨宿署中

獨宿官居靜維舟古岸斜塵埃猶吏局烟水寄吾家鄉
夢連宵動歸心計日差何晨望星斗曉櫓趣嘔啞

南湖晚霽

雨脚隨雲斷湖光帶日還微虹初照水餘霧尚懷山理
網漁歌喜支篷孤棹閒蕭然安艤泊盡室畫圖間

過白公堂

四百餘年兵火後至今遺構葺如新謫官豈是多恩惠
誰謂文章不動人

庾樓

仗節當年分國寄危樓千古壓江潯山川風月宜如舊
踈曠還同庾老心

狄公祠

數間冷屋蒼山背
忠孝功名萬載師
曲俗佞神惟畏禍
停舟祇謁小姑祠

陶令祠

莫笑先生猶假醉
先生于道未宜輕
門前五柳今何在
唯有江流百丈清

舍綺霞閣五首呈石丈職方

綺霞閣

美構冠名城區區喜與登澄泉朝竊鑒爽氣夜相陵物
象方傾蓋襟懷過飲永蒼葭此何幸玉樹是依憑

水中亭

回環水面碧于藍曉夕清虛萬象涵佳趣不容為獨權
史君橫約在亭南

枯荷

綠萍漂合舊根斜獨恨來遲過了花不見離披照秋水
盡依名閣作餘霞

蕉逕

兩行對植接低圯弱質毋嫌費
壅治十月綠陰猶滿逕也勝蒲柳望秋衰

小山

嵌空尋尺立池津池北池南孰可鄰
草樹自羞還自笑凋榮一節任天真

和石丈職方長春花

烏奕紅芳續皇皇若競辰盡居羣卉右
獨得四時春孤

節寒方見滂葩日又新
笑梅侵臘候欺菊冒蕭晨
值賦知均被生成此特頻
咨咨偏惠意天聽杳難塵

待令移寓趙氏園亭

待次鄉閭計索然
故人亭館寓蹉跎
折腰五斗羞彭澤
破屋數間如玉川
曉竹冒霜清節苦
夜禽啼月小聲圓
蕭條真趣非無賴
捽茹簞瓢素所便

賀簡夫石丈罷令先期請老

七十能歸世已稀
掛冠況在壯齡時
休風遠過疏公上

清節未甘陶令卑
門枕白雲朝睡美
席函明月夜杯遲
區區膠祿寧無耳
漏盡鐘鳴合自思

遣興一絕

睡思容易醒
輾轉衾裯單
今宵聽風竹
始覺窗外寒

得陳安道書知移邑名次

安道枉書自東都
報我外移春可準
予方寂處藜藿空
蓄縮僅同枯壤蚓
聞之雖喜良自嗟
仕豈為貧今頗近
男兒有志期必行
五斗折腰何足愍

初睡

凍雲卷盡月華清
寒氣稜稜夜轉生
一卷古書齊萬慮
滿杯醇酎卧三更
附炎鄙態悲時薄
養僻孤蹤任俗評
曠逸最便朝睡美
鄰雞不用再三鳴

憶富川四首

渴憶富川好官居
似隱潛江山慰情淡
魚稻養貧廉旅傳
無將送徃牢絕滯
淹踈閒真自得何恤
遠炎炎

渴憶富川好孤城
揀翠屏淳風在人物
真趣滿郊垌野

屋千間古晴山四壁清別來平鄙思偃卧閱圖經
渴憶富川好優游度歲時白雲藏治署蒼竹對書帷奕
戰侵遺笑詩壇讓擁麾還鄉固佳况疇昔尚深思
渴憶富川好官休欲放船垂囊買村釀擲餌得溪鮮迹
寄紛囂外情攄曠逸全交游日相醉屢以去期遷

陪胡公奕碁

區區席末侍枯碁臆計蒼黃膽欲飛制勝固難施小智
冥行多是觸沈機狂謀殊愧千無得銳氣何勞十即圍

賤子歟歸深自慶祇凋榮帶老人輝

清明

去歲清明富水濱今年舊里遘芳辰
風流蕭灑殊前日花木依稀似故人
遊覽不宜辭爛熳別離還復在逡巡
整閒幸可頻吟醉春色當于我輩親

阻雨

清明未遠正春濃澍雨無情苦見攻
沽酒窮壚應減價障泥豪錦若為功
輪蹄寂寞湖山閣桃杏凋疎臺榭空

唯有居閒足幽况晏眠冷屋似山翁

病目未愈

病目私廬藥足治

平

茫然盈月尚多眇易平本遠風埃

路難愈應緣筍蕨時花入書編飛撲撲星攢簷隙轉纍
纍古今是否消深慮視少唯便默以思

即事

雲物半陰晴春蠶酒氣清花空葉自隘梅重核初成
嚔論無柔語酣歌有壯聲翠眉應見笑先老擲風情

杜鵑

杜鵑叫林表曉窓色初分却憶動鄉思去年江外聞

周生哀辭

所到固為命嗟君志不通未施稽古效遽溝及泉凶玉
毀垂成際蘭摧共茂中哀歌閉新壟寂寞四山空

致政胡郎中生日

未容廣受擅餘徽遠嗣親榮二十期

先尚書前歸
休於杭地

山嶽

有神儲秀日朝廷無事乞身時挂車濯濯吳風厚奉壽

詵詵夏景遲賤士葭莩敢為獻願光南國過期頤

和簡夫遊南巖

古寺因山半翠微躋攀危蹬上雲扉祇應秀色隨秋吹
還似紅塵染客衣子賤鳴絃方暇逸淵明解綬已來歸
吾儕幸得陪清覽相與優游養道肥

又和見招鼓山遊

氣涼天淡正時秋野興山情猝未休承召驩于鳬藻甚
但憂塵迹累清遊

又和閒居

雨餘秋氣逼幽齋時動新篇雅奏諧不是溪山清耳目
自緣冰雪滿襟懷榮名疣贅心都棄世事毫毛力已排
唯有鑒湖風月近賀公前迹可為儕

和撲滿

一等出鈞陶唯便兒女曹誨慳材甚小撲滿禍難逃所
忌同歌器為憂在錯刀物微誠諭遠招損警貪饕

送處道丈之台任民掾

辭曹新調補術學久堅完有位欲行志愛民無小官脂
車乘短日山國動微寒即聽佳聲滿賢勞豈或嘆

簡夫丈昔遺老杜別集而驤以外集當之久而亡
去近承多本因以詩請

昔日交傳集外詩規模雖記舊編遺近聞機格多兼副
可賜閒中一解頤

贈項子後處士

介似於陵可謂清老來志操益堅成脅肩傳會羞衰俗

卷二
梓姑優游盡此生祇以圖書養高性不繇林藪市虛名
誰編野史防遺逸當為先生作獨行

去年今日

去年今日到宣州舟倚昭亭晚雨收鴨脚飣盤隨土物
蟹螯將酒掩珍羞溪間鴈集菰蒲老田外人歌穰稔稠
此際剡遊還憶舊閒中情味兩悠悠

憶江上

故歲官還勢亦勤飄然單舸下長津風江無定收帆早

夜浦多虞擊折頻俸輟稻梁雖怕乏直輕魚蟹不嫌貧
蒼波古木應如舊惆悵經由又隔春

千佛巖讀書寄內

官期末迫暫閒身數學巖居及夜分霜落空山寒切骨
風號萬木響連雲有民勿謂書休讀無術當知政必勞
獨宿不辭應會我功名富貴本辛勤

石夫人挽辭

有子任清時夫人新拂衣人生到此樂天數奈相違壺

蕭風現在奩間粉澤微雲愁寒壘暮何處是魂歸

石經老挽辭

已矣九泉歸嗟君值短期胸襟遺草在孝友闔門悲學
謝生前用名多沒後知幽冥當自慰造物本無私

詠唐史

李衛公

靖本名
樂師

能作膏肓遺蕭輔

高祖曰李靖是蕭銳輔
公祐膏肓謂破之也

更於西北振

威雄

北謂突厥西謂立
大寧王慕容順

若非明主矜羸老幾向高麗棄

舊功

末年欲征高麗太宗不許

李英公

勅本徐世勣

威加突厥勝長城

太宗曰今委李世勣于并州豈不勝遠築長城

藥賜鬚灰感

聖情垂沒訓言非不慮奈何墳土竟遭平

尹思正

執筆威踰知一杖忤權活得月將身位終八座非為幸
埋戟相符豈不神

李朝隱

搜官鞭奴蔑貴權當時風角慢衣冠及為御史聲名減
豈是官高便欲安

張中令

九齡

金鏡文高壓萬珍開元寵遇號知人范陽奏日言如用
安得西蒙蜀道塵

李適之

鑛金言率遇參商罷相還歌樂聖章怖死宜春中姦賊
令人扼掣痛其亡

二閣

立德
立本

八座蟬聯屬弟兄當年門地足輝榮可嗟不富經綸業
唯著丹青制造名

蘇世長

披香殿上嘆隋君校獵營間勸十旬莫謂口忠心則詐
何如膠口不言人

劉知幾

五說三長歷歷陳堅辭史任斥因循若教直筆專歸手

金史卷一百一十五
卷二
褒貶應能慰後人

盧懷慎

言極公忠器業清死猶勤懇薦時英賢哉度已推姚相
不幸幡成伴食名

李林甫

國忠禍釁根芽日此賊傾唐勢已先構陷名臣冤且衆
天乎何意與終全

楊國忠

權由寵盛危宗社天子傾心日自如十萬北來猶未悟
潼關尚聽促哥舒

王珪

斥姬援祖沃君心貞觀箴規器獨深私廟因循遭糾劾
可嗟玼玷在球琳

戴胄

持平遠繼張廷尉獻議嘗班魏鄭公誰謂尚書無學術
沒身何媿謚為忠

戴至德

神翰飛英紀至賢謂如舟楫濟洪源偷名豈學劉仁軌
專向朝堂賣主恩

魏鄭公

東宮嘗吠非其主貞觀終高獻納臣不獨齊桓忘射帶
太宗當日最知人

虞世南

太宗寵異號名臣五絕當年賜目新亡也重嗟文物去

石渠東觀謂無人

韋見素

入相年餘值狂寇獨隨車駕豈非忠奸兇萌禍根茲遠
史筆如何罪及公

契苾何力

自稱烈士受唐恩寧死延陀不屈身莫陋將軍本蕃種
中朝似此幾何人

李光弼

金史卷之三
卷二
閩外分憂屢積勲間言幾欲變深恩十年三覲勞方面
榮耀雙旌並在門

鄧景山

并門雄鎮軍權重歛怨殘軀不足傷偏將贖身由納馬
賤人貴畜自為殃

韋堅

勿詫崔生得丁統體都董歌運潭聚歛一何多術雖可

鄙非其死甚矣姦臣恣網羅

房琯

蜀途赴難忠雖固車戰亡師咎已深天子未歸京未復
不知何暇有琴心

崔蕘

大臣許國當由道執政如何事佛淫身附姦邪不知禍
却談報應感君心

楊綰

總政中書月未期郭崔奢侈遽中移代宗勿嘆天亡早

用相斯人已後時

郭子儀

凌烟閣上中興後勲德光全屬令公魚革也知深用力
其如謙巽悟宸衷

蕭復

面排盧杞興言佞背沮劉公受旨私真相不知知彼相
便容辭疾等閒司

柳渾

刑寬毀玉回天怒
智料渝盟識虜情
延賞見躋終不愠
陶陶誰似柳宜城

李揆

獻替初雖有可賢
忌能遭貶是誰愆
顰頭鼠目言何易
重困江湖十五年

憶雙柑樹

憶昔厚栽培
憐雙異衆材
青青江外色
往往夢中來
未得甘棠比
寧隨弱柳衰
春華攄勁質
冷淡為誰開

送劉誠夫江陰獄掾

學老才優底裏精青衫今始掾江城高門積德功須倍
三尺持平道可行聽決即能誠吏俗名聲安用勢公卿
相逢未幾還相去贈別非言豈慰情

石龜

磨琢成龜智不虛天然體理畫難如世珍未許論荆璞
神迹當曾負洛書山澤秘竒西蜀遠星辰分氣北方餘
堅完自得靈身計安用區區免余且

縣齋即事

作邑慙無術懷民賴有年
訟筒消不逞賓席汰非賢
奉養庭闈穩論求典冊
全誰言非吏隱山水匝城堧

喜德甫彥文至

昏昏山雨鎖春暉
褊邑蕭條客至稀
憐子遠來求所益
愧予無術慰焉依
文章未易論高出行誼當須及庶幾
幽閣羣書足游意聖賢雖邈欲誰歸

雨池荷花

雲翳前山雨脚長
灑然清氣動蓮塘
花中潤色添來美
葉上繁聲過去忙
紅面渾羞泣珠淚
翠盤微重瀉瓊漿
蕭蕭古縣無公事
贏得澄神坐冷床

金華按覆回止普淨

雨止山路滑肩舁進亦難
官拘當勉力室處豈非安
淺澗流還急鳴禽意自寬
來歸雖薄暮古寺且盤桓

登樓

邑落昏山水登樓遠目通
從容民事外游息聖經中
畫

餅羞虛譽持衡尚至公此心難語俗舉袂挹松風

離邑之衢按獄

出野暴雨作遲晴方戒行溪山百里秀氣象一番清于
役途雖遠祛慮意自平民田况交隸足以慰予情

野塘白蓮

路轉方塘口塘蓮雲不如孤芳已難值秀色况非餘及
鑒波平後飄香雨過初泥途憂澣汚頑驚仗誰祛

石龍

金匱要略卷二
隱隱蒼山壁蜿蜒此蟄身物生多有象人附即為神頭
角千年古威靈一境伸確然難以詰立馬為逡巡

還邑遇雨

一陣陰雲一雨來驅除煩暑灑塵埃山川固不為迎合
豈是先知地主迴

聞國哀

欲及乾元節登遐詔忽繯萬方鈞疾痛三紀被仁恩氣
象河山慘光華日月昏小臣忠未效飲泣望崑崙

縣圃刈禾

林下圭田一畝餘，春耕秋歛亦勤渠。
年豐獨喜能鈞衆，月給誰嗤薄助吾。
己愧拔葵賢魯相，更羞塵甑誦萊蕪。
字民固合知民事，稼穡艱難坐可圖。

荅呂秀才

惻微賙急意雖完，勢力鎔銖豈自安。
畎畝君憂家計迫，風波我畏宦途難。
敝衣非不憐原憲，塵甑其如類范丹。
情禮甚勤無以謝，愧將珉石報琅玕。

荅顏長道見寄

花溪前日還轅處惆悵高賢又阻陪
山雨在雲方慘淡野烟籠水正低徊
別離輕似風飄絮遲想多於渴望梅
胸腹殷勤豈無感果然緘寄好詩來

同邑簿檢貤堤柳乘興游保壽僧舍

撥置簿書看種柳等閒聯轡入雲岐
山僧莫道疎迎候我輩行行不自知

過紫霄宮

先春曾宿紫霄宮今日重遊春正融誰道居官便跼縮
也能偷暇向忙中

遊壽山

暫離簿領來鄰邑旋訪靈蹤到壽山乘閒一遊真未易
豈論身寄此中閒

下山復題二首

頻望羣峯目已驚山僧更解說山情夕陽歸去心難足
未聽飛泉雨後聲

宛轉松蹊入五峯更臨危閣半晴空山花鳥語皆真趣
誰是韜光傲世翁

望方巖

路過方巖未及遊肩輿回首興難收野桃帶日遙相笑
笑我山情不自由

宿靈巖

坐邑傳聞此巖好心疑好事張浮辭及來勝境窮遊覽
却悟前言有漏遺觸石烟雲如障俗倚崖殿閣半乘危

自嗟吏治多牽制祇作清虛一宿期

百丈蒼巖入杳冥高低氣象本天成
藤蟠翠壁龍蛇動澗瀉斷崖風雨聲
不許畫工為潤色祇應詩伯長餘情
棲鷗亂墨題僧室車馬何時再此行

自靈巖回途中寄顏令

吏役誰撓繞尋幽得二三穿雲離古觀
冒月宿靈巖乘興詩何擇孤遊語自緘
寄言酬地主清賞可無慙

冒雨遊石室

陟磴苔痕滑穿巖雨脚收愛山隣邑今來作雨中遊

雞人峯


石室前頭一片春天然形象附嶙峋山家况味無晨夕
安用雞人賦此身

雨止

雨止單蹊步可通尋春天氣似迎逢山花有意飄行蓋
野水無情照瘦容挈榼竟難成獨飲抽毫猶得當朋從
逡巡且盡今朝興數闔歸來趁暮鐘

曉霽歸邑

夜枕輕寒睡思衰
遲明方霽促歸來
車徒雖患泥行蹇
林麓還逢秀色迴
山雨定非天意足
溪雲應為主人開
野花零亂春禽鬧
此興何如鼓吹陪



錢塘集卷二